

Uunga siunnersuut: Inuit innarluutillit tapersorsorneqarnissaanut Inatsisartut inatsisaat nr. xx, xx. xxx 2019-imeersoq

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerpeqarnera

Inuit innarluutillit tapersorsorneqarnissaanut Inatsisartut Inatsisissaattut siunnersuutip peqqissaartumik suliarineqarsimaneranut, kiisalu siunnersuummik tigusilluarnerannut Ilaqutariinnermut Peqqissutsimullu Ataatsimiititaliaq Naalakkersuisut qutsavigaat.

Taamatutaaq ataatsimiititaliap isumaliutissiissummik saqqummiussaannik Ilaqutariinnermut Peqqissutsimullu Ataatsimiititaliaq Naalakkersuisut qutsavigaat.

Isumaliutissiissummi saqqummiunneqartumi siunnersuutip § 54-iata, tikeraarluni angalasarnernut tunngasup, allannguutissaanik saqqummiusseqqullugit ataatsimiititaliap Naalakkersuisut peqquai.

Peqqusineq taanna Naalakkersuisut akueraat allannguutissatullu siunnersuummik suliaqarlutik, tassani inunnut innarluutilinnut, Kalaallit Nunaata avataani inissinneqarallarsimasunut, tikeraarluni angalanerit ukiumut 2-t pisinnaatitaaffiusut, taamaallaat inuit 18-iniit 24-inut ukiullit ilaatinneqarneranninngaanniit inunnut innarluutilinnut Kalaallit Nunaata avataani inissinneqarallartunut tamanut ilanngussinnermik ilaneqarput.

Allannguutissatut siunnersuutip piviusunnigortinneqarnissaanut aningaasaliissutinik nassaartoqartariaqarpoq. Allannguutissatut siunnersuutip ukiumut 2,3 mio. kr.-it 3,8 mio.kr.-illu akornanni aningaasartuutaanerunissaa naatsorsuutigineqarpoq. Aningaasanut inatsisissap isumaqatigiinniutigineqarnerani siunnersuutit aningaasaliinissamik pisariaqartitsisut allat ilagalugit ataasimoortumik tullerriarinnissami aningaasaliissutissaq taanna ilaassaaq.

Kisitsisit atorlugit nassuiaasianut atortussanik paasissutissat pissarsiarineqartussat annertussusissaat pillugit siunnersuutip § 76, imm. 2-ani Naalakkersuisut malittarisassanik erseqqinnerusunik aalajangersaaqqullugit piginnaatinneqarput.

Piginnaatinneqarneq taanna Naalakkersuisut piaarnerpaamik atussagaat Ataatsimiititaliap innersuussutigaa, taamaalilluni kisitsisit atorlugit paasissutissat pisariaqartinneqartut amerlassusissaminnik pitsaassusissaminnillu imaqarlutik pissarsiarineqarnissaat qulakkeerneqarniassammat.

Taakku pillugit Namminersorlutik Oqartussat inuit innarluutillit tapersorsorneqarnissaat pillugu nalunaarutissaattut missingiummik suliaqartoqareermat Naalakkersuisut ilisimatitsissutigissavaat. Nalunaarutissatut siunnersuut tamanut ammasumik kommunitut tusarniutigineqaleerpoq Namminersorlutillu Oqartussat tusarniaanermut qupperaagaanni ilineqareerluni. Inatsisartut inatsisissaattut siunnersuutip atuutilersinneqarnera peqatigalugu malittarisassat taakku atuutilissasut Naalakkersuisut siunertaraat.

Taamatut oqaaseqarlutik Naalackersuisut Inatsisartuni siunnersuutip suli akuersaartumik suliarineqarnissaa innersuussutigaa.